

## **Акафист преподобному и богоносному отцу нашему Иоанну, пустыннику Рыльскому, чудотворцу**

### **Об исцелении немоты**

*Преподобный Иоанн Рыльский, живший в X веке, нес свои подвиги в Болгарии. В юных летах, после смерти родителей, он раздал все имение нищим, принял монашество и поселился на необитаемой горе. Разбойники, напав на него, выгнали его оттуда, и он удалился в пустыню на реке рило и поселился в дупле. Здесь святой прожил 60 лет, питаясь одной растительной пищей и не видя лица человеческого. Но со временем к нему стали приходить ищущие подвижнической жизни, и таким образом была устроена обитель.*

*К преподобному Иоанну Рыльскому обращаются за помощью в исцелении немоты. Акафист ему был составлен архиепископом Серафимом (Соболевым), строгим подвижником и любвеобильным пастырем XX столетия.*

#### **Кондак 1**

Избранный Богом и предивный житием, преподобне Иоанне, от юности Христа возлюбив, путем тесным к Нему шествовал еси; великих же ради подвигов твоих и слез излиятий дарованными Духа святого обогатился еси. Темже яко велие ко святей Троице дерзновение имуща ублажаем тя, просяще: от всяких нас бед свободы, зовущих: радуйся, преподобне Иоанне, рыльский чудотворче, славо и радости наша.

#### **Икос 1**

Ангел земный и человек небесный был еси, преподобне Иоанне. Како убо славу твою воспоем достойно, многими немощьми обдержимии? Но сам вложи песнь хвалебную во уста нас, зовущих:

Радуйся, от родителей благочестивых рожденный; радуйся, ими в страхе Божии добре воспитанный.

Радуйся, из младенства от Церкви николиже отступивый; радуйся, тоя священными ученьми благодатный разум стяжавый.

Радуйся, заповедей Господних блюстителю верный; радуйся, пошений и бдений непрестанных делателю усердный.

Радуйся, по смерти родителей наследие свое убогим раздавый; радуйся, жития ради добраго гонение от человеков лукавых подъявый.

Радуйся, клеветы неправедныя претерпевый; радуйся, досаждения с кротостию понесый.

Радуйся, любовию серафимскою вслед Христа последовавый; радуйся, ея ради путь Узкий Иночества избравый.

Радуйся, преподобне Иоанне, рыльский чудотворче, славо и радости наша.

#### **Кондак 2**

Видя мира сего суету, преподобне Иоанне, невозвратно того отвратитися потщался еси; ничтоже бо тебе от Христа можаше разлучити: ни Узы сродства, ни Юность твоя, ниже слава мира сего и красота. Сия Убо вся ни во чтоже вменив, Якоже елень на источники водныя, к Богу востекл еси, вопия Ему: Аллилуиа.

#### **Икос 2**

Разуму божественному покорился еси, блаженне, егда Господа в видении соннем узрел еси, от земли твоя изыти повелевающа ти и место спасения твоего показующа, и вся, яже в мире презрев, во обитель руенскую вселился еси, идеже образ Иноческий восприял еси. Сего ради вопием ти таковая:

Радуйся, житие Иноческое возлюбивый; радуйся, противу греха воинствовати даже до смерти восхотевый.

Радуйся, купно с власы своими мирская вожделения отложивый; радуйся, с ненасытною жаждею к подвигом иноческим себе устремивый.

Радуйся, в предняя простираяся, задняя забвению предавый; радуйся, сладость житительства уединенного в себе обретый.

Радуйся, любви ради божественныя житие пустынное возлюбивый; радуйся, вины ради сея место пострига своего оставивый.

Радуйся, к горе, в видении тебе явленной, пришедый; радуйся, ничтоже имеяй, в колибе хвратней себе вселивый.

Радуйся, дивный пустынножителю; радуйся, иоанна крестителя подражателю.

Радуйся, преподобне Иоанне, рыльский чудотворче, славо и радости наша.

### **Кондак 3**

Силою Духа святаго осеняем в пустыни вселился еси, Иоанне, безмолвное житие провождати, с Богом невозбранно беседовати, того ангельски непрестанно славословити, лучами света Божественного озарятися, за вся же люди и мир Спасителю Богу молитися, поя Ему присно: Аллилуиа.

### **Икос 3**

Имея желание огнепальное боговидения моисейскаго, преподобне, на гору возшел еси явления божественныя славы восприяти, Ихже Око не виде и ухо не слыша и Яже на сердце человеку не въздоша. И кто возможет изрещи вся подвиги твоя, в безмолвии сотворенныя? Но мы, дивящися житию твоему, сице взываем ти:

Радуйся, бремя подвиг велиих на рамена своя возложивый; радуйся, житием твоим Ангелов удививый.

Радуйся, яко не хлебом, но былием травным себе питал еси; радуйся, и того бо зело мало по захождении солнца вкушал еси.

Радуйся, жажду водою в меру утолявый; радуйся, купно с пророком «скотен бых у Тебе» Богу вопиявый.

Радуйся, яко потоки слез от очей твоих источал еси; радуйся, молитвы бо твоя непрестанно Богу возсылал еси.

Радуйся, подвиги сими от страстей себе очистивый; радуйся, бесов в зверине Образе тебе устрашити тщащихся посрамивый.

Радуйся, адаманте, козньми вражиими несокрушимый; радуйся, во всех искушениях и напастех всегда с Богом бывый.

Радуйся, преподобне Иоанне, рыльский чудотворче, славо и радости наша.

### **Кондак 4**

Бурю напастей демонских укротити восхотев, в пещеру некую зело мрачную вселился еси, преподобне Иоанне, порабощая тело твое и лишаяся света солнечнаго, яко да не лишишия Божественнаго Света в Царствии Господа твоего и да поеши Ему тамо со всеми святыми: Аллилуиа.

### **Икос 4**

Слышав о тебе, преподобне, сын брата твоего, лука Отрок, и родителей утаився, к тебе в пустыню прииде и тобою наставляем восприя подвиги твоя. Мы же силою благодати твоя ужасаеми, вопием ти сице:

Радуйся, Светом Божественным Южика своего озаривый; радуйся, дитя малое пустынна жителя соделавый.

Радуйся, от злобы древния сего ради напасть новую приемый; радуйся, клевету в похищении Отрока претерпевый.

Радуйся, от брата своего поругания понесый; радуйся, детище от тебе отторженное благословением укрепивый.

Радуйся, молитвою слезною диавола посрамивый; радуйся, Отрока, от змия ужаленного смертию, с Господом соединивый.

Радуйся, цвете райский на камени гор рыльских прозябый; радуйся, от камене Божественнаго водою живою обильно напоенный.

Радуйся, таинниче Божий, в пустыни не утаивыйся; радуйся светильниче Христов во мраце пещернем просветивыйся.

Радуйся, преподобне Иоанне, рыльский чудотворче, славо и радости наша.

### **Кондак 5**

Боготечней звезде подобни суть святии человецы: не точию бо сами ко Христу шествуют, но и прочим людям спасения путь указуют. Сего ради вселукавый творит им напасти, якоже и тебе, Иоанне: нападе бо на тя во Образе разбойник, Иже избивше тя, отгнаша от пещеры первыя. Тогда ты в пустыню Рыльскую глубочае вшед, в дупло дуба великаго вселился еси, во Еже большими труды Господа твоего прославляти и пети Ему: Аллилуиа.

### **Икос 5**

Видя Господь толикое озлобление твое, преподобне, повеле земли да израстит слануток тебе в питание; славна же ты яви пастырем, близ пустыни тоя обретшимся, да и мы купно с видевшими дивная дела твоя вопием тебе таковая:

Радуйся, от демонов велия страдания приемый; радуйся, воине Христов непобедимый.

Радуйся, не до конца от них озлобленный; радуйся, Христа покровом всемогущим покровенный.

Радуйся, пред лицом пастырей от Господа прославленный; радуйся, обретшим тя житие твое неволею известивый.

Радуйся, лаком чудесным тех напитавый; радуйся, отшедших их чудом дивным наставивый.

Радуйся, прочим людям от них проповеданный; радуйся, от приходивших к тебе дарований Божиих не скрывый.

Радуйся, зело страждуща бесна молитвою слезною исцеливый; радуйся, к совершению чудесе сего всю надежду на Бога возложивый.

Радуйся, преподобне Иоанне, рыльский чудотворче, славо и радости наша.

### **Кондак 6**

Проповедницы должны есмы быти смирения твоего, преподобне Иоанне, явленнаго пред исцелением беснаго в молитве твоей сицевою: «Боже милосердный, несмы достоин именовати Твое имя моими нечистыми усты!» Сего ради тщимся Убо и мы во смирении молитися господеву и пети Ему: Аллилуиа.

### **Икос 6**

Возсиявшу ти чудесы велиими, множайшую к тебе веру и любовь возимеша людие православнии. Но славе твоей по всей болгарстей стране прошедшей, востав изшел еси от дуба, славы человеческия бегая. Темже смирения ради твоего убожаем тя сице:

Радуйся, смирение божественное возлюбивый; радуйся, славу человеческую возненавидевый.

Радуйся, гласа Христова к смирению призывающа, послушавый; радуйся, словеса писания Еже не нам, но Имени Божию славу даяти, присно соблюдавый.

Радуйся, высокая достигнувый и ни киих дел благих в себе не видевый; радуйся, древу плодоносна, ветвми низу клонящуся, подобен бывый.

Радуйся, смирением Давиду, рекшему «аз есмь червь, а не человек», поревновавый; радуйся, купно с пророком исаиею «о, окаянный аз» вопиявый.

Радуйся, со апостолом грешника себе перваго нарицавый; радуйся, во смирении своем самому Господу подражавый.

Радуйся, тщеславию доблественне противоставый; радуйся, сие яко прах земный ногами поправый.

Радуйся, преподобне Иоанне, рыльский чудотворче, славо и радости наша.

### **Кондак 7**

Хотящу ти страдания большая подъяти пламенная ради ко Христу любви твоя, столпнику дивному симеону уподобился еси, на камень возшед, преподобне Иоанне, во дни и нощи Аки бесплотен молитву дея, слезами камень омакая и единому токмо Богу беседовати желая. Мы же на подвиг сей взирающе, прославляем всемогущаго Бога в тебе дивнаго и поем Ему: Аллилуиа.

### **Икос 7**

Новаго подвига твоего, блаженне, не стерпев диавол, поемлет с собою легион бесов, Иже с камне тя в пропасть глубокую свергоша. Но ты с трудом велиим востав, паки на камень возшел еси творити молитвы твоя и дивящихся воставляеши звати ти:

Радуйся, ко Христу любовь велию стяжавый; радуйся, сего ради тяжце от полков демонских пострадавый.

Радуйся, страдания сия ни во чтоже вменивый; радуйся, Христа паче жизни твоя возлюбивый.

Радуйся, ни чим же от Христа разлученный; радуйся, Им сего ради возлюбленный.

Радуйся, служения ангельскаго сподобивыйся; радуйся, от руки Ангела хлебом питавайся.

Радуйся, любовь ко Христу вся диавольская искушения победивый; радуйся, тою вся Христа заповеди соблюдый.

Радуйся, любви ради сея токмо славы божественныя искавый; радуйся, сего ради от Господа прославленный.

Радуйся, преподобне Иоанне, рыльский чудотворче, славо и радости наша.

### **Кондак 8**

Станный Образ жития твоего, велие смирение и любовь твоя ко Христу приумножиша в тебе благодать, Яже ти в крещении Христовых ради страстей и смерти крестныя даровася. Сего ради сотвори тя Господь солнце духовное Православныя Церкви, да просвещаются тобою чада ея ко спасению и да вопиют Богу: Аллилуиа.

### **Икос 8**

Весь был еси сосуд избран Божия благодати, великий Иоанне, на тебе исполнися крестителя слово, яко не в меру Бог дает духа. Киими благодатными дарованьми не увенча тя Бог? Киими явленьми благодати не исполнено бысть твое житие? Темже на тя взирающе, приносим ти похвалы сия наша:

Радуйся, дар смирения христова стяжавый; радуйся, слез и умиления благодать снискавый.

Радуйся, чистотою и целомудрием от Бога украшенный; радуйся, верою чудодейственною озаренный.

Радуйся, не токмо Христу веровавый, но и страдания за него понесый; радуйся, даром ревности по Бозе увенчанный.

Радуйся, любви к ближним исполненный; радуйся, даром божественнаго ведения сподобленный.

Радуйся, даром прозорливства просиявый; радуйся, дарование молитвы непрестающия имый.

Радуйся, до конца надежду будущего блаженства сохранивый; радуйся, блаженство сие еще в жизни сей предвкусивый.

Радуйся, преподобне Иоанне, рыльский чудотворче, славо и радости наша.

### **Кондак 9**

Всякое дарование духа святого восприимшу ти, преподобне Иоанне, достиже вещание твое благочестиваго царя петра, Иже видети тя вожделев посла к тебе девять мужей. Ты же Алчных их быти духом разумев, малым хлебом напитал еси, Иже преславное чудо сие видевше, вопияху Богу: Аллилуиа.

### **Икос 9**

Ветии мира сего не разумеют, како царь Петр, сый во славе своей, к тебе с дары устремися, блаженне, и зело опечалися, не возмогий стремнин ради горных ко святыни твоей приблизитися; но мы, словеса Господа поминающе, ко всем людем реченная, «ищите прежде царствия Божия и правды Его», вопием ти:

Радуйся, яко Царство Небесное на земли достигл еси; радуйся, Царство бо сие, пришедшее в силе, яви ти Господь.

Радуйся, яко Царство Божие в стяжании благодати людем явил еси; радуйся, во плоти бо сый блаженство райское в себе таил еси.

Радуйся, яко бисер многоценный стяжав, суету благ временных показал еси; радуйся, яко правду и мир и радость о душе святе имел еси.

Радуйся, сиянием бо благодати славу царскую затмил еси; радуйся, яко сокровище небесное имый, даров царских не приял еси.

Радуйся, яко зрети друг друга в Небеснем Царствии царю Петру обещал еси; радуйся, яко царя в Писании твоём милосерда и Церкви послушна быти увещал еси.

Радуйся, яко покаянию царя научил еси; радуйся, яко покаяния ради царство вечное ему предрекл еси.

Радуйся, преподобне Иоанне, рыльский чудотворче, славо и радости наша.

### **Кондак 10**

Спасти хотя себе до конца от козней вражиих, преподобне Иоанне, пребыл еси в подвизе стояния на камени семь лет и четыре месяцы. Мнози же поревновавше тебе, близ камене твоего церковь создаша и обитель составиша, начальника тя перваго и пастыря имуще, да возсылается оттуду присно хвалебная Богу песнь: Аллилуиа.

### **Икос 10**

Стена непреборима бысть ти смирение твое даже до смерти, блаженне Иоанне; разумев бо время отшествия твоего, моление слезное Богу вознесл еси, глаголя: «Отче вседержителю, ничтоже на земли благо сотворих! Сего ради молю Тя повелети Ангелу благу приити, да не возбранен ми будет восход от духов лукавствия! Господи, в руке Твои предаю дух мой!» И сия рек, Абие дух испустил еси. Мы же, сицевому праведному преставлению дивящися, тако тя ублажаем:

Радуйся, житием и исходом твоим нас поучай; радуйся, горняя мудрствовати, а не земная нас призывай.

Радуйся, никиимже сластем мирским себе приобщивый; радуйся, блаженную кончину от Бога приемый.

Радуйся, о смерти присно в животе своем помышлявый; радуйся, словеса апостола «по вся дни умираю» исполнивый.

Радуйся, со апостолом Павлом смерти вожделевый; радуйся, разрешитися и со Христом быти присно желание имевый.

Радуйся, слезами и молитвами себе к смерти уготовавый; радуйся, сего ради от смерти не на суд, но в живот пришедый.

Радуйся, вечней радости со Христом по смерти приобщивыйся; радуйся, дерзновение велие пред Богом стяжавый.

Радуйся, преподобне Иоанне, рыльский чудотворче, славо и радости наша.

### **Кондак 11**

Пением молебным ублажати тя наставшу времени, благовоние нача от гроба твоего источатися, преподобне Иоанне. Сего ради гроб твой отверзоша и тело твое обретоша нетленно и благоухания исполнено. Оттоле многая чудеса совершахуся от мощей твоих во исцеление к тебе прибегающих и Богу вопиющих: Аллилуиа.

### **Икос 11**

Светоприемную свещу яви тя господь, преподобне, и храм духа святого, тело же твое тлению непричастно соблюде. Взвираючи Убо на благодать сию, прославляем тя сице:

Радуйся, нетлением твоим всемогущество Божие благовествуяй; радуйся, бессмертие телес последи общаго воскресения предобразуяй.

Радуйся, нетлением твоим славу Божию в Церкви явивый; радуйся, Истину воскресения мертвых утвердивый.

Радуйся, по смерти игумену обители рыльския во сне явивыйся; радуйся, твоя мощи в средец град пренести повелевый.

Радуйся, дивная чудеса и zde сотворивый; радуйся, в град тернов пренесен велия знамения соделавый.

Радуйся, от мощей твоих во градах стольных благодать пролиивый; радуйся, и в пленении быв силами всех ужасивый.

Радуйся, мануилу царю греческому исцеление даровавый; радуйся, епископу острогомскому язык связавый и разверзавый.

Радуйся, преподобне Иоанне, рыльский чудотворче, славо и радости наша.

### **Кондак 12**

Благодать велию дарова ти господь за многую любовь, предивный угодниче Божий, преподобне отче наш Иоанне, недуги исцеляти, заблуждшия просвещати и всем просящим быти во спасение. Темже благодаряще господя, нам тебе даровавшаго, присно зовем Ему: Аллилуиа.

### **Икос 12**

Поюще тебе песнь недоумеем, како вся дивная деяния твоя словесы немощными изобразити, преподобне! Зряще же тя велика в угодницех божиих, дерзаем сице восхвалити тя, зовуще:

Радуйся, в подвизех и трудех предивный; радуйся, прославленным тобою Богом прославленный.

Радуйся, далече вне церкви болгарския просиявый; радуйся, и иными Православными церквами чтимый.

Радуйся, нетленною десницею в Церкви россиястей обитаяй; радуйся, благодатию великих отцев Церкви блистаяй.

Радуйся, подвиги преподобных антония и макария явивый; радуйся, деяния светил россияских сергия и серафима предизобразивый.

Радуйся, от краля унгарскаго прославленный; радуйся, и от турских султанов почтенный.

Радуйся, во обители рыльстей верными и неверными доселе почитаемый; радуйся, велиих ради чудес твоих от всех прославляемый.

Радуйся, преподобне Иоанне, рыльский чудотворче, славо и радости наша.

### **Кондак 13**

О великий Иоанне, рыльский чудотворче! Приими сию малую похвалу нашу и молися за ны ко Господу, да ниспослет нам милость Свою и покаянию истинному научит нас, избавит же нас от власти миродержителей тьмы века сего и сохранит в православней вере же и благодатном жительстве под дивным покровом Божия Матере, да спасеннии твоим ходатайством вопием Богу: Аллилуиа.

*Этот кондак читается трижды, затем 1-й икос «Ангел земный...» и 1-й кондак «избранный Богом...»*

### **Молитва**

О великий и предивный чудотворче, преподобне Иоанне, приими моление наше и не отворачивайся от нас, к твоему заступлению прибегающих: никогдаже бо отвращался еси от приходивших к тебе с печальми своими во дни земнаго твоего жития; вемы же, коликая знамения милосердия являл еси и по преставлении твоем людем православным! Услыши и нас ныне, велиими скорбьми обдержимых, нашедшими на ны в лукавыя дни сия, егда диавол чрез пагубныя козни своя тщится попрасти Церковь Святую, лишити же нас спасения вечнаго и благ временныя жизни! Испроси нам у Господа Иисуса Христа прощения грехов, а наипаче греха непослушания Матери нашей Церкви! Даруй нам сокрушение сердца, во еже со умилением неуклонно приступати ко святому таинству покаяния, яко да не во осуждение и погибель будет нам причащение тела и крове Христовых, но во здравие и спасение. Отжени от нас дух братоненавидения, даруй нам дух любви и мира к братскому единению всех людей твоих! Соедини всех нас любовью ко Христу и Его Церкви православней, яко да соблюдающе спасительную волю Его, Истинная чада Божия будем! Буди нам путевождь во вся дни наша, яко да присно в благодати духа святаго суще в чистоте веру содержим и волю Господню до самыя смерти сотворим! В час же кончины наша явися нам представити души наша к Престолу божественнаго судии и рещи Ему: «Се аз и дети моя», яко да твоим заступлением вечных мук избавльшися, неизреченное блаженство Небеснаго Царствия Христова наследим купно с тобою и всеми святыми во веки веков. Аминь.